

Met ehotamma ette sie vain luet pdf-fiilin särmilä, etkä lattaa sitä omhaan taattorhiin. Joissaki taphauksissa pdf-fiili latataan automaattisesti ko sie aukaset sen. Poista (radera) silloin fiili otsikon `nouetut fiilit/hämtade filer` alla. Jos sie kuitenkin säästät fiilin taattorissa, pane se paperikorhiin ja klikkaa "Tyhjenä paperikori/Töm papperskorgen" ko sie olet lukenu sen. Jos sie halvat tietää mitenkä sie otat pois web-histuriikin taattorista, sillä ette halvat peittää ette olet käyny web-paikala, johon lattasit tämän tokymentin, sie klikkaat "Käynin peittäminen/Att dölja besök". Sielä oon kans punanen knappi jonka kautta helposti pääset toisele websivule, www.google.se

Tervetuloa poliisin informasuunisivule rikoksista lähheisissä suhteissa.

Tästä sie, joka olet joutunu rikoksen kohtheeksi saat tietää lissää siitä mitä oikeuksia sulla oon ja siitä miten poliisi saattaa auttaa sinua. Sieki joka olet totistaja saatat löytää tietoja siitä mitä sie saatat tehdä jos sie epäilet ette joku sinun lähheisyessä oon joutunu rikoksen kohtheeksi. Tervetuloa tänne!

Mikä räknäthään rikokseksi lähheisessä suhteessa?

Rikoksilla lähheisissä suhteissa tarkotethaan rikosta jossa se joka joutuu sen kohtheeksi oon eli oon ollu naimisissa, sampu eli säärpu tekijän kans, eli hällä oon lapsia tekijän kans.

Sitä saattaa kans joutua rikoksen kohtheeksi ko vanhemat, sisarukset eli muut sukulaiset tekevä sen, niin sanottu kunnihaan liittyvä rikolisuus. Rikos saattaa esimerkiksi olla fyysinen, psyykkinen eli seksuaalinen väkivalta. Rikokseksi räknäthään kans tilantheet jossa toinen osapuoli pakottaa eli uhkaa toista, lukitsee sisäle eli oon toisen tykönä ilman luppaa. Rikokset lähheisissä suhteissa kuuluva ylheisen syytheen (åtal) pihriin, joka tarkoittaa ette poliisilla on velvolisuus selvittää rikos – ja se joka oon joutunu rikoksen kohtheeksi ei saata estää ette selvitys panhaan alule. Selvitystä johtaa syyttäjä

Laki rauhanrikkomisesta

Vuona 1998 laki törkeästä (grov) rauhanrikkomisesta ja törkeästä vaimonpuolen rauhanrikkomisesta astu voihmaan.

Lue enämpi siitä mitä laki rauhanrikkomisesta tarkoittaa osotheesta www.bra.se

Mikä oon rikolista?

Ennenkö saatethaan alottaa poliisiselvitys, vaaitaan ette oon syytä uskoa ette semmonen rikos oon tehty joka kuuluu ylheisen syytheen pihriin, esimerkiksi ette jollaki oon ollu mustelmia, haavoja eli muita vahinkoja semmosen väkivallan seurauksena jonka takana oon joku lähheinen eli hään kertoo ette hään oon joutunu lähheisen väkivallan eli uhkauksen kohtheeksi, esim. SMS- eli meiliuhkauksen kautta.

Oonko sulle tapahtunut sitä?

Tämän tyyppisiä rikoksia tapahtuu kaikenlaisissa suhteissa, kaikissa yhteiskunnan ryhmissä, joka puolelta maata.

Rikokset tapahtuva usein kotona ja sillä net saattava olla poliisille ja muile oikeuslaitoksessa vaikeat havata. Sen takia saattaa kans olla vaikeaa puuttua asihhaan ja auttaa sitä joka on joutunu sen kohtheeksi. Monessa taphauksessa mustasukkasuus eli konflikti erihleen siirtymisen eli eron yhteyessä on mutivi. Alkkohoolia on usein matkassa. Ussein on kans kyse siitä ette toinen osapuoli halva valtaa ja kontrollia toista kohthaan. Kyse saattaa kans olla niin sanotusta kunniaan liittyvästä rikolisuuesta, eli se ette pere vahtii omia jäseniä niin ette net ei tehe jotaki joka saattaa vaarantaa perheen kunniaa. Eli ette net rankaseva perheenjäsentä joka on rikkonu suvun sääntöjä.

Tietämätön määrä rikoksen kohtheeksi joutunheita

Tämä on tavalisen tyyppinen rikos. Kukhaan ei tiä tarkhaan kuinka moni on joutunu sen kohtheeksi, mutta Rikoksia etukätheen estävän raatin (Brottsförebyggande rådet), brå:n, mukhaan, 25 prosenttia rikoksen kohtheeksi joutunheista, ilmottava. Vuona 2011 poliisille ilmoitettiin 35 035 taphausta jossa miehiä, vaimonpuolia ja lapsia oli pahoinpietty. 69 prosenttia ilmoituksista oli semmosia joissa ilmottaja oli joutunu nykyisen eli entisen partnerin rikoksen kohtheeksi. Ette jos tämä on tapahtunut sulle, sie et ole yksin.

Tavalista vähenellä

Monet jotka joutuva partnerin rikoksen kohtheeksi jatkava kuitenkin elähmään suhteessa pitkiä aikoja. Siihen ette jääpi suhteeseen saattaa olla monta selitystä: sitä rakastaa vieläki ommaa partneria, sitä on huolestunut siitä mitenkä hälle käypi jos sitä lähtee, eli sitä pölkää pois lähön seurauksia. Se on kans tavalista ette se joka on joutunu rikoksen kohtheeksi itte vähentellee väkivaltaa ja "viftaa pois" sen mitä on tapahtunut, jos on pitkhään eläny psyykkisessä ja fyysisessä väkivallassa, tuntee ittensä vähemmän arvoiseksi ihmisennä. Sitä syyttää itteä ja pittää ette on ansainu väkivallan.

Varotussingnaalia

Oon olemassa joitaki tavalisia varotussingnaalia jotka saattava viitata siihen ette kaikki suhteessa ei ole aivan oikein. RFSLn web-paikala on lista kysymyksiä jotka saattava auttaa sinua itenttifieeraamaan tavalisimat varotussingnaalit. Sieltä löyät kans länkkiä muile orkanisasuunile joitten puohleen saatat kääntyä jos sulla on kysymyksiä ja ajatuksia siitä oletko sie eli joku jonka sie tunnet, joutunu tämmösen rikoksen kohtheeksi.

Lissää informasuunia

Rikosuhripäivystys HBT-henkilöile/Brottsofferjour för HBT-personer: www.rfsl.se/brottsoffer

Tukitelefooni vaimonpuolile jotka on joutunhee uhkauksen, väkivallan eli seksuaalisen vääryyen kohtheeksi.

www.kvinnofridslinjen.se

Ilmottaa eli ei?

Poliisille se ei ole epävarmaa, rikokset lähveisissä suhteissa pitää ilmoittaa poliisille.

Kuitenki monet, jotka joutuva tämän rikoksen kohtheeksi, jättävä tekemättä poliisi-ilmotuksen. Piain tuntheita partneria kohtaan vielä oon, eli sitte sitä pölkää ette saapi rangastuksen myöhemin. Yhtheiset lapset saattava kans olla syy siihen ette rikosta ei ilmota. Saattaa kans olla niin ette tapahtuma tuntuu liian privaailta eli henkilökohtaselta, eli ette tuntee syyllisyyttä, häpeää och ja ette syyttää itteä siitä minkä kohtheeksi oon joutunu.

Saattaa kans olla niin, ette sitä ei usko ette tämän tyyppiset rikokset oon tarpheeksi vakavat ette tehä ilmoitus eli ette poliisi ei ota sitä tosissa. Sille joka joutuu kunnihaan liittyvän rikoksen kohtheeksi saattaa tuntua vaikealta yksin olla kokohnaisen suvun normia ja asentheita vasthaan.

Tärkeää ilmoittaa

Jos sie jou´ut tämän tyyppisen rikoksen kohtheeksi, sinun pitää tehä poliisi-ilmotus. Ilmotus saattaa olla keino lopettaa semmonen elämäntila jossa essiintyy väkivaltaa ja loukkauksia.

Muutki saattava ilmoittaa

Ussein se oon rikoksen uhri joka tekkee poliisi-ilmotuksen, mutta seki oon tavalista ette osapuolitten ystävät ja krannit ilmottava rikoksen. Jos sie eppäilet ette joku oon joutunu rikoksen kohtheeksi, sie saatat kontaktata poliisiin, joka päättää jos asiaa selvitetähän etheen käsin.

Hyvä muistaa

Oon asioita jotka oon hyvä muistaa jos sie elät suhteessa jossa jou´ut uhkauksen, väkivallan eli loukkauksen kohtheeksi:

- Puhu ystävitten kans joihin sie luotat, kerro omasta tilantheesta. Silloin net saattava tukea sitä mitä sie sanot maholisessa oikeuenkäynnissä.
- Kontaktaa vaimon- eli miehenpuolitten päivystys (-jour). Netki saattava tukea sitä mitä sanot maholisessa oikeuenkäynnissä.
- Kirjota päiväkirjaa johon tokymenteeraat missä ja koska sinua loukathaan, uhathaan eli lyöhään, ja kans mitenkä ja mihin sinua lyöhään.
- Älä pese vaatheita jotka sulla oon olhee päälä pahoinpitelyn eli seksuaalisen väärysten yhtheyssä.
- Tokymenteeraa omat vammat, ota mielelhään kuvia. Eli piä huoli siitä ette tohturi tokymenteeraa net.
- Säästä maholiset uhkaukset jotka saat telefoonivastajaan, e-postin eli sms:in kautta. Lähätä net ystäville jotka saattava säästää net. Net saattava olla tärkeitä viisimateriaalia.

Tuki ja suoja

Monet oon huolestunhee ilmoituksen tekemisestä, piain ko pölkäävä sitä jonka het ilmottava. Poliisi saattaa tehdä uhkaus- ja riskiarvioinin ja nähä oonko sinua tarve suojata.

Suojaa oon olemassa eri astheista, ja se riippuu siitä miltä uhkakuva näyttää. Poliisilta saatat saa neuvoja, vartiointia ja erilaisia teknisiä apuväliheittä, esimerkiksi suojapaketin jossa oon muumuassa larmitelefooni jossa oon GPS ja akystinen larmi. Sie saatat kans saa oman kontaktihenkilön ja mahdollisuen saa informasuuni- ja turvalisuuskeskusteluja.

Poliisi tekkee kans yhtheistyötä muitten instansitten kans yhtheiskunnassa jokka saattava antaa sulle suojaa. Kunta saattaa esimerkiksi antaa sulle suojatun asumisen ja sie saatat saa tukea rikosuhripäivystyksestä (-jouren). Vapaaehtosia orkanisasuunia oon kans jokka saattava auttaa sinua.

Syyttäjä saattaa päättää kontaktikielosta. Se tarkoittaa ette se joka mahdollisesti uhkaa sinua ei saa ottaa kontaktia sinun kans käynin, telefonin, e-postin eli semmositten kautta. Usseimilla poliisiviranomhaisilla oon niin sanottu rikosuhrikoortinaattori joka saattaa kertoa enämpi.

Sie saatat kans saa apua rikosuhrikorvauksen muo'ossa, mutta se vaatii ette oon tehty poliisi-ilmoitus. Jos oon olemassa ilmoitus, sulla oon kans mahdollisuus hakea korvausta sinun vakkuutuspuulaakilta vahinkoista.

Lissää informasuunia

Rikosuhritukea: www.brottsoffermyndigheten.se

Tukitelefooni vaimonpuolile jokka oon joutunhee uhkauksen, väkivallan eli seksuaalisen vääröyren

kotheeksi: www.kvinnofridslinjen.se

Mitenkä ilmoitus tehhään?

Jos sie itte olet, eli joku jonka sie tunnet oon joutunu rikoksen eli uhkauksen kotheeksi, sinun pitää ilmottaa se Poliisille.

Sie saatat joko soittaa Poliisille numehroon 114 14 eli 112 jos asia oon akyytti. Sie saatat kans kääntyä suohraan poliisiaseman puohleen sielä missä sie asut. Jos sie halvat, sie saatat kans tahtoa apua joltaki johon sie luotat, esimerkiksi ystävä eli työkaveri.

Mitäs sitte tapahtuu?

Ko Poliisi oon ottanu vasthaan sinun ilmoituksen, sinut kuttuthaan kuulustelhuun ette saat kertoa enämpi. Poliisikuulustuksessa oon tärkeää ette sie niin tarkhaan ko mahdollista kerrot siitä mitä oon tapahtunnu. Minkälaisen uhkauksen, väkivallan eli muun rikoksen kotheeksi sie olet joutunu? Kuka eli kukka tehit sen? Oonko sitä tapahtunnu kauon? Oonko totistajia? Oonko joku tehny sulle vahinkoa? Mitenkä? Sen tyyppishiin kysymykshiin oon tärkeää saa vastauksia niin ette asia mennee etheen käsin.

Esitutkimus

Rikosselvitys, jota kuttuthaan esitutkimukseksi, tehhään sen takia ette koota tietoja siitä mitä oon tapahtunnu. Sitä johtaa syyttäjä. Ko esitutkimus oon valmis, syyttäjä päättää jos oon tarpheeksi viisiä ette sitä vasthaan jota eppäihlään rikoksesta, saattaa nostaa syytheen. Syytheen seuraus oon suuliset neuvottelut käräjäoikeudessa, sitä kuttuthaan oikeuenkäyniksi. Sielä kuulustelhaan sinua, syytettyä (jota vasthaan oon nostettu syyte) ja maholisia totistajia. Site tuomioistuun tekkee oman arvioinin ja ilmottaa tuomion. Jos sie, eli syytetty, että ole tytyväisiä käräjäoikeuen tuomihoon, siitä saattaa valittaa hovioikeutheen.

Mitä tapahtuu jos ilmotus hyläthään?

Joskus asia hyläthään viisitten puutheessa. Se ei tarkota ette poliisi eli syyttäjä ei usko sen kertomusta joka oon joutunu rikoksen kohtheeksi, ko johtuu kertakaikkihaan siitä ette asiaa ei saata viä syytheesheen jos ei ole tarpheeksi viisiä eli totistajia jotka tukeva rikoksen kohtheeksi joutunheen kertomusta.

Lissää informasuunia

Oikeuenkäyntikoulu: www.rattegangsskolan.se

Tunneks jonku joka oon joutunu rikoksen kohtheeksi?

Jos sie olet joutunu lähheisessä suutheessa tehtyn rikoksen totistajaksi, eli sie eppäilet ette joku sinun lähheisyessä oon joutunu semmosen kohtheeksi, sie saatat itte tehdä poliisi-ilmotuksen.

Tämän tyyppisen rikoksen ilmottaminen saattaa tuntua vaikealta. Jos sie et halva tehdä muo´olista (formell) ilmotusta, saatat kuitenkin ottaa yhteyen poliisin kans ja kertoa sinun eppäilyistä ja olla anonymi. Silloin se oon poliisin asia ottaa selvile jos asiasta pittää tehdä poliisi-ilmotus. Jos sie olet hoito- ja huolto (omsorg) töissä, sulla oon vississä taphauksissa velvolisuus ilmottaa jos joku joutuu rikoksen kohtheeksi.

Eppäiletkös sie ette lapsi oon joutunu rikoksen kohtheeksi?

Jos sie eppäilet ette lapsi oon vaarassa, sie saatat tehdä anonymin ilmotuksen sosiaaliviranomhaisille sinun kunnassa (sie löyät net sinun kunnan kotisivulta). Silloin net tekevä selvityksen ja ilmottava poliisille. Jos sie olet töissä hoito-, koulu- eli lastenhuoltoalala, sulla oon aina velvolisuus ilmottaa jos sie eppäilet ette lapsi oon vaarassa.

Täältä saat tukea ja apua

Lasten oikeus yhtheiskunnassa: www.bris.se

Pelastakaa lapset: www.raddabarnen.se

Poliisi kokoa voimat

Poliisi ottaa rikokset lähheisissä suhtheissa rohki vakavasti.

Ette suuri ryhmä yhtheiskunnassa joutuu uhkauksen ja väkivallan kohtheeksi kotohnaan, oon suuri yhtheiskuntaprupleemi. Se oon kans rikos joka ei vain ole Ruottin lain vasthainen, se oon kans vasthaan FN:in julkilausuntaa ihmisoikeuksista.

Kohtelu ratkasee

Poliisin työn lähtökohtana pitävä olla sanat "osalistuva, efektiivinen ja saatavilla oleva." Se oon tärkeää joka asiassa, mutta piiain erityisen tärkeää ko oon kyse rikoksista lähheisissä suhtheissa.

Met tiämä ette sillä mitenkä met kohtelemma rikosuhria oon ratkaseva merkitys sille ette rikoksen kohtheeksi joutunhee tohtiva tehdä ilmoituksen – ja viä sen lophuun saakka. Samala laila alkuvaiheen selvitystoihmeenpanot oon tärkeitä onnistunheele selvityksele. Se saattaa esimerkiksi jällata totistajitten kuulustelua ja rikoksen uhriksi joutunheen vammoitten tokymenteerausta. Oon tärkeää huomauttaa ette poliisilla oon velvolisuus olla opjektiivinen selvityksen aikana ja poliisin pittää ottaa huomioon ja käyttää hyöyksi niin semmosta joka oon eppäiltyyn henkilön euksi ko hänen haitaksi.

Kansalinen strategii

Poliisi tekkee koko ajan työtä tämän tyyppisitten rikoksitten selvittämisen parantamisen puolesta. Tavote oon ette saa useamat ilmottamaan, vähentää rikosmäärää jota ei ilmoiteta (mörkertal), lisätä efektiiviteettiä työssä ja lisätä taphauksia joista nostethaan syyte. Uuet, paremat koulutukset oon lisähnee poliisin kompetenssiä. Informasuuni ja kokemuksitten vaihtaminen, niin sisäsesti ko syyttäjitten ja muitten viranomhaisitten ko vapaahtositten orkanisasiunitten kans, oon nostanu kysymystä korkeamalle akentalla. Koulutuksia lapsiselvittäjille ja niile jotka selvittävä kunniaan liittyviä rikoksia oon kehitetty ja paranettu.

Mitenkä lapset vaikuttuva?

Lapset jotka kokeva loukkauksia, uhkauksia ja väkivaltaa kotona, saava usein niin fyysisiä ko psyykkisiä vahinkoja.

Nämät lapset näyttävä enämpi merkkiä huolestunheisuesta, ahistuksesta, tepresuunista, post-traumaattisista stressisyntroomista ja akresivisuudesta ko muut lapset, tutkimukset näyttävä. Sen takia se oonki tärkeää ette lapsia ei unohteta, vaikka vanhemat uskova ette lapset ei ole nähnee eli huomannee väkivaltaa eli uhkauksia. Semmosia tutkimuksia oon kans jotka näyttävä ette minkä enämpi vaimonpuolta pahoinpiethään, sen suurempi riski oon ette lasta pahoinpitelee niin hänen mamma ko pappa.

Mitenkä poliisi tekkee työtä lapsitten kans?

Poliisilla oon erityisesti koulutettuja lapsikuulustelijoita jotka oon tottunhee kohtaamaan ja puhuttelheen lapsia jotka oon joutunhee kaiken tyyppisitten rikoksitten kohtheeksi. Lapsia, jotka oon nähnee (bevittnat) väkivaltaa lähheisissä suhtheissa, nähhään rikosuhriksi ja niilä oon oikeus saa rikosvahinkokorvausta. Ennenkö lapsi saapi rikosvahinkokorvausta, vaaitaan aina poliisi-ilmotus.

Erityisiä lastentaloja (barnahus)

Monela paikkakunnala maassa oon niin sanottuja lastentaloja, joissa poliisi, syyttäjä, tohturi ja sosiaaliset viranomhaiset oon koottu saman katon alle. Se tarkoittaa ette lapsia ei tartte kuljettaa viranomhaiselta toisele ja se oon helpompi lapsele. Se helpottaa kans niitten viranomhaisitten työtä ja koortineerausta jotka oon matkassa ja siitä seuraa selvityksitten parempi kvalitee.

Lissää informasuunia

Lapsitten oikeus yhtheiskunnassa: www.bris.se

Pelastakaa lapset: www.raddabarnen.se

Joutunu kunniarikoksen kohtheeksi?

Tästä saatat lukea mitä tukea ja apua sie saatat saa jos olet joutunu kunniaan liittyvän rikoksen kohtheeksi.

Elätkö sie tilantheessa jossa et itte saa päättää mitä vaatheita sie piät ja ketä sie saat kohata, eli jossa sie saat sölkhään ette opit tottelemhaan? Tunneks ette vanhemat ja sukulaiset vahtiva, kollaava ja uhkaava sinua? Jou´utkos sie pimittämhään seksuaalisen taipumuksen? Silloin sie saatat olla joutunu yhen eli piiaian useaman kunniaan liittyvän rikoksen kohtheeksi.

Niin pojat ko tyttäret kokeva

Vieläki oon olemassa käsitys ette kunniaan liittyvät rikokset vain koskeva tyttäriä ja vaimonpuolia, mutta pojat ja miehet kokeva sitä kans. Net oon ussein enämpi vaphaita ko tyttäret ja vaimonpuolet, mutta kyllä heilekki sattuu muumuassa järjestettyjä avioliittoja ja pakkoavioliittoja. Heän tehtäväksi tullee kans vahtia ja kollata sisaria ja nepokoita. Jos pojat ei täytä ootuksia, net saattava itte joutua väkivallan ja sortamisen kohtheeksi. Oon tunnettuja taphauksia ko poikia ja nuoria miehiä oon tapettu ko net oon valihnee väärän partnerin eli net oon käyttäytynhee seksuaalisesti tavala jota piethään erilaisena.

Kunnarikoksia homo-, bi- ja transseksuaalisia kohtaan

Homo-, bi- ja transseksuaalisilla henkilöillä jotka elävä kunnialkulttuurissa oon erityisen suojaton ilane. Homo-, bi ja transseksualisuus oon tapuytä monissa ytheiskunnissa ja se nähään laittomana tekona. Silloin oon suurempi riski joutua vainoamisen, syrjimisen, väkivallan ja murhan kohtheeksi. Homo-, bi- ja transseksuaalinen poika eli tyär saattaa olla rasisus (belastning) perheele ko se saattaa vaikuttaa perheen maihneesheen ja sitä myen kunnahaan nekatiivisesti. Lapsen seksualisuus ei vaarana vain heän omia maholisuuksia avioliithoon, ko heän sisaruksittenki.

Mitä laki sannoo?

Jyriitissillä tärmilä sanotusti se "vahtiminen" ja "vaikutus" joka suuntauu sinhuun saattaa olla vaphauenriistämistä, pakottamista, uhkausta, kiusaamista eli pahoinpitelyä. Net oon vakavia rikoksia. Jos sie itte, eli joku jonka sie tunnet oon joutunu jonku näitten rikoksitten kohtheeksi, sinun pittää ilmottaa siitä poliisille. Jos sulla oon kysymyksiä kunniaväkivallasta, ota ytheys poliisin eli tyttäritten- eli vaimonpuolitten päivyestyksen (-jour) kans.

Kysymyksiä & Vastauksia

Kysymys: Perhe lähtee kotimaahan kesälä ja luultavasti mie hääyn mennä naimishiin vasthaan minun tahtoa. Mitä mie tehen?

Vastaus: Ota ytheys poliisin, vaimonpuolitten päivyestyksen eli sosiaalipalvelun kans ja kerro sinun eppäilyistä. Se oon tärkeää, hinnasta mistä hyvänsä, estää reisu jos oon syytä eppäilä ette sie hääyt mennä naimishiin sinun tahtoa vasthaan. Sitte ko olet ulkomaila, Ruottin viranomhaisilla oon vaikeampi auttaa sinua.

Kysymys: Mistä saatan saa apua jos tunnen ette minua uhataan?

Vastaus: Jos sinua oon loukattu eli uhattu, sie saatat joko kääntyä poliisin, Sosiaalipalvelu eli vaimonpuolitten päivyestyksen puohleen jos sinun lähheisyessä oon semmonen. Vaimonpuolitten päivyestykselä oon ussein kontakti sosiaalipalvelun kans ja net saattava akyytti tilantheessa auttaa sinua saahmaan suojatun asumisen ja kontaktia eri viranomhaisitten kans. Monela maan paikkakunnista oon suojattua asumista jossa pärsunaali oon spesialiseerattu auttamhaan ihmisiä jotka oon joutunhee kunnahaan liittyyvän rikoksen kohtheeksi. Monet näistä asumisista ottava vasthaan lapsia, akyytissäki tilantheissa.

Kysymys: Kuinka kauon saatan saa suojatun asumisen?

Vastaus: Sulla oon oikeus saa suojatun asumisen niin kauon ko siitä oon tarve ja niin kauon ko olet saanu apua löytämhään oman asumisen.

Kysymys: Mitä tapahtuu jos mie menen poliisiin tykö?

Vastaus: Poliisi selvittää mitä on tapahtunut ja sen oonko syytä jatkaa selvitystä. Ko sie olet joutunu rikoksen kohtheeksi, sinut kuttuthaan kuulusteluun. Poliisi tulee kans kuulustelueen eppäiltyjä tekijöitä ja totistajia, niinku esimerkiksi perheen jäseniä ja muita osalisia. Lopulta selvitys saattaa johtaa syytheeseen yhtä eli useampaa rikoksen tekijää vasthaan.

Kysymys: Mitenkä mie saatan suojata itteä?

Vastaus: Tavalisuueksa poliisi tekkee uhka- ja riskiarvioin ja tarvittaessa net saattava auttaa sinua suojaamaan itteä eri mallila, esimerkiksi hyökkäyslarmila. Poliisilla oon kans rikosuhrikoortinaattoria eli sen kaltasia jotka tekevä rikosuhritukevaa työtä. Monet poliisiviranomhaiset tekevä kans yhtheistyötä aatheelisitten orkanisasiuunitten kans, niinku vaimonpuolitten- eli tyttärilttenpäivystys.

Kysymys: Saatanko mie saa mithään tukea oikeuenkäynnin aikana?

Vastaus: Sie saatat saa apua asianomistaja-avustajalta (målsägandebiträde), oma jyristi joka auttaa sinua. Sie saatat kans saa totistajatuksa henkilöltä joka antaa praktista informasuunia ja apua oikeuenkäynnin yhtheyessä. Se oon ilmaista.

Lissää informasuunia

Rikosuhripäivystyksitten Valtakunnallinen liitto (Brottsofferjourernas Riksförbund) tekkee työtä rikosuhritten paremitten eelytyksitten puolesta: www.boj.se

Kunniansorto: www.hedersfortryck.se

Sinun oikeuet: www.dinarattigheter.se
www.flicka.nu

Vaimonpuolitten päivytyksitten valtakunnallinen orkanisasiuuni: www.roks.se

Oikeuenkäyntikoulu: www.rattegangsskolan.se

Ruottin Vaimonpuolitten päivytyksitten valtakunnallinen liitto: www.kvinnojouren.se

Heikentyyny toimintakyky?

Rikoksia lähheisissä suhtheissa tapahtuu kaiken tyyppisissä suhtheissa, kans semmosissa suhtheissa joissa toinen osapuoli oon riippuvuussuhtheessa toisheen – esimerkiksi heikentyneen toimintakyvyn seurauksenna. Kyse saattaa olla fyysisistä heikentyneistä toimintakyvyistä niinku rajotettu liikkuminen eli heikentyyny näkö ja kuulo, mutta kans psyykkisistä eli intelektuelisesti heikentyneestä toimintakyvystä.

Tällä ryhmälä oon erityisen vaikea tilane, juuri sillä ko net usein oon niin riippuvaisia siitä henkilöstä joka oon niin partneri ko syylinen. Sen takia nämät rikokset oon vielä vaikeampi havata. Sen takia sie, joka näet, eli eppäilet rikosta ihmistä kohthaan jolla oon heikentyyny toimintakyky, olet erityisen tärkeä. Jos olet yhtheyessä jonku kans joka sie uskot oon joutunu rikoksen kohtheeksi, joko sinun työn kautta eli muula mallin, sinun pittää tulla poliisiin tykö asian kans.

Hyvä muistaa.

Oon asioita jotka oon hyvä muistaa ennenkö tehet poliisi-ilmotuksen, asioita joila saattaa olla suuri merkitys sille ette selvitys onnistuu ja ette asia saattaa jatkua oikeuenkäyntiin.

- Puhu ystävitten kans joihin sie luotat, kerro sinun tilanteesta. Silloin net saattava tukea sitä mitä sie maholisessa oikeuenkäynnissä sanot.
- Kontaktaa vaimon- eli miehenpuolitten päivystys (-jour). Netki saattava tukea sitä mitä sie sanot maholisessa oikeuenkäynnissä.
- Kirjota päiväkirjaa jossa sie tokymenteeraat missä ja koska sinua loukataan, uhataan eli lyöhään, ja kans mitenkä ja mihinkä sinua lyöhään.
- Älä pese vaatteita jotka sulla oon olhee päälä pahoinpitelyn eli seksuaalisen vääryyden aikana.
- Tokymenteeraa omat vammat, ota mielelhään kuvia. Eli piä huoli siitä ette tohturi tokymenteeraa net.
- Säästä maholiset uhkaukset jotka saat telefoonivastaajan, e-postin eli sms:in kautta. Lähätä net ystäville jotka saattava säästää net. Net saattava olla tärkeitä viisimateriaalia.

Täältä saat tukea ja apua

Sulle, joka jou'ut rikoksen kohtheeksi, oon olemassa apua. Monila kunnilla oon apu-prukrammia ette auttaa rikoksen kohtheeksi joutunheita vaimon- ja miehenpuolia. Saatat kans ottaa yhteyttä jonku niitten valtakunnallisitten orkanisasiunitten kans joita oon. Tästä alhaalta löyät länkkiä joihinki eri orkanisasiunihin.

Sillekki, joka halva muuttaa omaa väkivaltasta käytöstä, oon olemassa apua, ja kokemus näyttää ette usseimat halvava tehä sen. Net, jotka hakeva apua siihen ette lopettaa käyttämästä väkivaltaa, oon kohtapa aina huolissa ja pölästynheitä omasta väkivaltasesta käytöksestä. Net tunteva ussein häpeää ja syyllisyyttä. Useimissa kunnissa oon päivystyksiä ja erityisiä vasthaanottoja jotka oon tottunhee käsittelehmään tämän tyyppisiä kysymyksiä ja jotka saattava auttaa.

Lissää informasuunia

Lapsitten oikeus yhtheiskunnassa: www.bris.se

Lapsiasioitten asiamies: www.barnombudsmannen.se

Rikoksia etukätheen estävä raati: www.bra.se

Rikosuhripäivystyksitten Valtakunnallinen liitto: www.boj.se

Rikosuhriviranomhainen: www.brottsoffermyndigheten.se

Jystiitsieompyytmani: www.jo.se

Vaimonpuolitten rauhalinja: www.kvinnofridslinjen.se

Valtakunnallinen liitto seksuaalisen samanarvosuuen puolesta: www.rfsl.se

Riikinkriisikeskus: www.rikskriscentrum.se

Vaimonpuolitten päivystyksitten Valtakunnallinen orkanisasiuni: www.roks.se

Ruottin vaimonpuolitten päivystyksitten Valtakunnallinen liitto: www.kvinnojouren.se

Met saatama auttaa sinua

Väkivaltaa tapahtuu kaikenlaisissa suhteissa, joka puolela koko Ruottia. Met tiämä ette monet 10 000 joutuva sen kohtheeksi joka vuosi, piain lähemäs 100 000. Elätkös sie tilanteessa jossa sattuu loukkauksia, uhkauksia ja väkivaltaa? Silloin sinun pittää tulla poliisiin tykö. Sie olet saattanu joutua vakavan rikoksen kohtheeksi ja jonka pittää ilmoittaa poliisille. Soita 114 14 eli käy lähhiimällä poliisiasemalla. Akyytit taphaukset, soita 112.

